

ВО ВТОРНИК ВТОРЫЯ СЕДМИЦЫ ПО ПАСЦЕ ВЕЧЕРА

На Господи возвах: поставим стихов 6, и поем стихиры, глас 1-й..

Подобен: Прехвальнии мученицы:

Осяжи, глаголет Фоме, из мертвых тридневен воскресый Человеколюбец, и виждь руку Моею и ногу язвы, и ребр прободение: и познай Мя Бога непременна, земным смешением по существу воображенна и страсть в нем приемша.

Недоумевашеся Близнец, язвы зря ножныя, и ручная вонзения, и бяше ужасаемь страшным чудом: и рукою пречистое ребро и осязая и видя, из нихже показа несомненное языком, еже из гроба тридневное востание.

Приемлю превеликое радование, Твое Спасе мой востание известуемое видя: от нихже сподобися дерзостным вещем Фома прикоснуться. Темже Тя проста проповедуем Бога и Человека, действия два носяща существенна, от нихже сложился еси.

И Минеи, 3. Слава, и ныне: глас 4-й.

Господи, нестерпимым Твоего Божества блистанием, дверем пришел еси сущим заключенным, и став посреде учеников, ребро обнажил еси, и язв Твоею руку и ногу струпы являя, печаль же и скорбь разрешая, яве возгласил еси: имже образом во Мне видите, о друзи, плоти приятие, не духа ношу естество. Сомнящему же ся ученику повелевал еси осязати трепетно, рек: испытав вся, гряди прочее не сумнися. Он же ощущая рукою Твое сугубое существо, со страхом вопияше верно, верою влекомь: Господь мой и Бог мой слава Тебе.

Свете тихий:

На стиховне стихира Крестна, глас 1-й.

Крест водрузися на лобнем, и процвете нам безсмертие от источника приснотекущаго ребра Спасова.

Стих: К Тебе возведох очи мои:

Приидите людие воспоим, и поклонимся Христу, славяще Его еже из мертвых Воскресение, яко Той есть Бог наш, от прелести вражия мир избавлей.

Стих: Помилуй нас Господи, помилуй нас:

Мученичен: **О** добрыя купли вашея святии! яко крови дасте, и небеса наследовасте, и привременно искусившеся, вечно веселитесь. Воистинну добра ваша купля: тленная бо оставльше, нетленная восприясте, и со ангелы ликующе, поете непрестанно Троицу Единосущную.

Слава, и ныне: глас 8-й.

Прикоснися Фомо рукою ребром, глаголет Христос, и язвы гвоздей прииди осяжи: верою испытай, и буди Ми верен, и не буди неверен. Фома же перстом

яко прикоснуса Владыце, вельми возопи: Ты мой Бог и Господь, благоутробне слава Тебе.

Таже, **Н**ыне отпускаеши:

По Трисвятом, тропарь праздника. Аще ли тропарь святого, рцы его прежде.
Потом:

Слава, и ныне: Тропарь праздника, глас 7-й

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

И отпуст.

Вестно буди, яко в среды и пятки предваряют стихиры Крестныя, такожде и седальны воскресны: занеже Господь наш первее распяся, посем же воскрес из мертвых.

В СРЕДУ ВТОРЫЯ СЕДМИЦЫ НА УТРЕНИ.

На Бог Господь, тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [Трижды].

По 1-м стихословии, седален Крестный, глас 1-й.

Распеншуся Тебе Христе, погибе мучительство, поправа бысть сила вражия: ниже бо ангел, ни человек, но Сам Господи спасл еси ны, слава Тебе.

Стих: Возносите Господа Бога нашего, и покланяйтесь подножию ногу Его, яко свято есть.

Исаак на холм возведен бысть, Иона во глубину низведеса, и оба страсть Твою Спасе образоваста. Ов убо узы и заколение: ов же погребение, и жизнь преславнаго востания Твоего. Господи слава Тебе.

Стих: Дивен Бог во святых Своих, Бог Израилев.

Болезными святых, имиже о Тебе пострадаша, умолен буди Господи, и вся наша болезни исцели, Человеколюбче, молимся.

Слава, и ныне: Крестобогородичен:

Твое предстательство имуще Пречистая, и Твоими молитвами лютых избавляеми, Крестом Сына Твоего везде соблюдаеми, по долгу Тя вси благочестно величаем.

По 2-м стихословии, седален, глас 1-й.

Подобен: Гроб Твой Спасе:

Прикоснувшись рукою ребром нестерпимым Ближец Фома, не опалися прикоснутием: но пребысть язвы осязая известнее, и вещая нас ради прободенному: Ты мой Господь, Ты и Бог мой еси, аще и страсть претерпел еси.

Слава, и ныне: тойже.

Воскресение Христово видевши: псалом 50. Канон праздника, со ирмосом, на 8: и Миней на 4. По 3-й песни, седален Миней, и ексапостиларий праздника.

Песнь 1.

Ирмос: Поим вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруй, всяк ум преимуц.

И святаго Минея на 4.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: Утверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствововати достойно повелел еси.

Во гробе заключен описанною плотию Твоею, неописанный Христе воскресл еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

И святаго Минея на 4.

Катавасия: Приидите, пиво пием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

И кондак, и седален святаго.

Слава, и ныне: седален празднику, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: Велия тайна Твоего Христе, смотрения: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуетися испытаеть: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомага Божественного, Благодетелю, копием прободенного Твоего ребра, премудрости и разума наполняет мир близнец.

Твой всеблаженный хвалится язык, о близнече! Первый бо благочестно проповедует Жизнодавца Иисуса, Бога же и Господа, от осязания исполнься благодати.

И святого Минея на 4.

Катавасия: **На** Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: **От** ноци утреннюю поем Тя, Христе, Отцу Собезначальна, и Спаса душ наших: мир миру подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемаго Фомы страшного начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

И святого Минея на 4.

Катавасия: **У**тренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: **П**ророка спасл еси от кита Человеколюбце, и мене из глубины предгрешений возведи, молюся.

Фомы не оставил еси Владыко, погружаема глубинное неверия, длани простер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

И святого Минея на 4.

Катавасия: **С**низшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаклученным бо дверем яко вшел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязимую? Аще бо не бы ребро силу подало брэнней деснице, како можаше осязати, страданьми поколебавшая яже выше, и яже низу? Сия благодать Фоме дадеся, еже сия осязати, Христови же вопити: Господь еси и Бог мой.

Песнь 7.

Ирмос: Образу служити мусикийскому согласию созывающу люди, от песней Сионских поюще отечески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси.

Един дерзнувый, неверною же верою облагодетельствовавый нас Фома близнец, решит убо мрачное неведение всех концев, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не все усумневся Фома о востании Твоем, не низложися: но несумнительное тщашеся показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемьма неслиянно, и верою взываше глаголя: Ты еси Господь превозносимый отцев и наш Боже, благословен еси.

И святого Минея на 4.

Катавасия: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Песнь 8.

Ирмос: В пламени огненне горящая печи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподоблься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осызана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

И святого Минея на 4.

Катавасия: Сей нареченный и святыи день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

И стихословим Честнейшую

Песнь 9.

Ирмос: Тебе светлую свещу, и Матерь Божию, пречудную Славу и высшую всех тварей, песньми величаем.

Твой светлый день и пресветлый Христе, всесветлую благодать, воньже красный добротою учеником Твоим предстал еси, в песнях величаем.

Тебе брэнную дланию осызаема в ребра, и не опаливша сию, огнем невестественнаго Божественнаго существа, в песнях величаем.

Тя яко Бога из гроба воскресша Христа, не очима видевшие, но сердечною любовию веровавшие, песньми величаем.

И святого Минея на 4.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Екзапостилларий, глас 3-й:

Подобен: Небо звездами:

Моих удов рукою твоею испытавый язвы, не неверуй Ми Фома, уязвленному тебе ради, со ученики единомудрствуй, и живущаго проведуй Бога. [Дважды]

Слава: святого, аще есть и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друга вопиюща: Господь и Бог мой.

На хвалитех настояция стихиры крестныя, на 4. Глас 1-й.

Тебе на Древе пригвождьшагося, и живот нам подавшаго, яко Спаса и Владыку поем непрестанно. [Дважды.]

Ада пленивый, и человека воскресивый, Воскресением Твоим Христе, сподоби нас чистым сердцем Тебе пети и славити.

Мученичен: Вас всехвальнии мученицы, ни скорби, ни теснота, ни глад, ни гонение, ниже раны, ни ярость зверей, ни меч, ниже огонь претящий, разлучити от Бога возмогоша: любовию же паче к Нему, яко в чуждых подвигшеся телесех, естество забысте, смерть презревше: темже и по достоянию трудов ваших мзду приясте, Небеснаго Царствия наследницы бысте. Имуще дерзновение к Человеколюбцу Богу, мирови мир испросите, и душам нашим велию милость.

Слава и ныне: глас 8-й.

Дверем заключенным, учеником собранным, предста Спас, идеже бяху собрани, и став посреде их, глаголет Фоме: прииди, осяжи, и виждь образы гвоздей. Простри руку твою, и коснися ребру Моему, и не буди неверен, но верою проповеждь еже из мертвых Мое Воскресение.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2-й.

Подобен: Доме Евфрафов:

О чудесе новаго! * о преславнаго образа! * како трава не опалися, * рука апостолова * огнем Божества?

Стих: Во всю землю изыде:

Потщимся и мы * руки освятити, * страстей упражнением, * и тако Владычним * ребром прикоснемся.

Стих: Небеса поведают славу Божию:

Обнови душе, * вся твоя чувства * к божественному зрению: * Христос бо сице хочет * совершати обновлением.

Слава, и ныне: Богородичен, подобен тойже:

Виждь ми умно, * пременение мира, * и украси яже внутрь, * добродетельми яко листвием душе, * и украсишися.

Таже, Благо есть исповедатися Господеви

Трисвятое. И по Отче наш:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Таже ектения: Помилуй нас Боже:

Час 1. И отпуст.

На Литургии

Блаженна от канона праздника, песнь 5-я.

Представ другом скорбящим Спас, пришествием всю отъемлет скорбь, и играти воздвизает Своим Воскресением. [Дважды.]

О воистинну похваляемаго Фомы страшнаго начинания! Дерзостно бо осяза ребра, Божественным огнем блистающая. . [Дважды.]

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец. . [Дважды.]

По входе тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И храма Богородицы, и храма святаго. Посем настоящего святаго, аще есть. Таже кондак храма святаго. Слава: святаго:

И ныне: праздника: Кондак, глас 8-й:

Любопытною десницею, жизноподательная Твоя ребра Фома испыта Христе Боже: созаклученным бо дверем яко вшел еси, с прочими апостолы вопияше Тебе: Господь еси и Бог мой.

Храма же Христова, и Богородицы кондак, во всю Пятдесятницу не глаголем.

Прокимен Апостола, глас 3-й: Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 11. [Деян. 4, 13 – 22.]

Во дни оны, видяще же Петрово дерзновение и Иоанново и разумевше, яко человека не книжна еста и проста, дивляхуся, знаху же их, яко со Иисусом беста: Видяще же изцелевшаго человека с нима стояща, ничтоже имяху противу рещи. Повелевше же има вон из сонмища изыти, стязахуся друг со другом, Глаголюще: что сотворим человека сима? Яко убо нарочитое знамение бысть има, всем живушим во Иерусалиме яве, и не можем отврещися: Но да не более прострется в людех, прещением да запретим има ктому не глаголати о имени сем ни единому от человек. И призвавше их, заповедаша има отнюд не провещавати ниже учити о имени Иисусове. Петр же и Иоанн отведавша к ним реста: аще праведно есть пред Богом вас послушати паче, нежели Бога, судите: Не можем бо мы, яже видехом и слышахом, не глаголати. Они же призапрещше има,

пустиша я, ничтоже обретше како мучити их, людей ради, яко вси прославляху Бога о бывшем: Лет бо бяше множае четыредесяти человек той, на немже бысть чудо сие изцеления.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 15. [Ин. 5, 17 – 24.]

Рече Господь ко пришедшим к Нему иудеом: Отец Мой доселе делает, и Аз делаю. И сего ради паче искаху Его иудее убити, яко не токмо разоряше субботу, но и Отца Своего глаголаше Бога, равен Ся творя Богу. Отвеща же Иисус и рече им: аминь, аминь глаголю вам, не может Сын творити о Себе ничесоже, аще не еже видит Отца творяща: яже бо Он творит, сия и Сын такожде творит. Отец бо любит Сына, и вся показывает Ему, яже Сам творит: и болша сих покажет Ему дела, да вы чудитесь. Якоже бо Отец воскрешает мертвыя и живит, тако и Сын, ихже хоцет, живит. Отец бо не судит ни комуже, но суд весь даде Сынови, Да вси чтут Сына, якоже чтут Отца. (А) иже не чтит Сына, не чтит Отца пославшаго Его. Аминь, аминь глаголю вам, яко слушаый словесе Моего и веруый Пославшему Мя имать живот вечный, и на суд не приидет, но преидет от смерти в живот.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.

Аллилуиа, [трижды]